

【好空】徐子涵原作

人講，笑頭笑面个人較有人緣；佢講，會講客个細人仔較得人惜。係兩種加起來，就會變出當多好空个事情出來哦！

社區肚个老老嫩嫩，佢比吾姆還較熟事；社區肚个事情，乜比佢還較瞭解。成時攞兜仔菜、帶兜仔糖仔轉屋，騙阿姆講係佢買个，佢都會相信。因為連佢都想毋著，無緣無故有麼儕會分佢。無論係食个、著个、用个，抑係搞个，所有好空个，通棚都係佢好嘴碼摺禮貌換來个。

對門九十六歲个伯婆太講，這下个細人仔，毋知係畏羞抑係搨屎，盡少像佢恁有笑容、恁會同人相借問个，故所特別惜佢，盡阿謔佢。佢輒輒會攞手喊佢過去，拿兜仔零嗒分佢食，佢講就佢正有恁好空。同佢講話，全全愛用客話講，佢正聽得識，佢想怕係因為恁樣，正無細人仔愛同佢講話。三條巷仔个細人仔，就單淨佢一儕做得同佢謔多半點鐘久，無講花蓼哦！

莫看佢年紀還細，係自行車落鏈<sup>1</sup>、輪仔同球仔無風，佢自家就有辦法，毋使花錢去尋人搨手整、搨手嘮風。係愛打羽毛球，

乜有大人同佢做伴搞，恁樣講，你就知吾个朋友有幾多、年齡層有幾闊哩！

細人仔自然就會搞共下，毋使加講，愛講个係，該兜鄰舍做麼个會恁惜佢呢？該係因為佢當笑面，會同人打嘴鼓，還會同人搨手。比將講搨手倒垃圾、拚資源回收个東西、講兜仔笑科分人笑、講兜仔令仔分佢兜揣、講兜仔生趣个事情分佢兜聽，就連老伯姆來賣菜，佢乜會搨手喊：「買菜哦～！愛買菜無呢？」微微末末，講都講毋得煞，吾个大人朋友就係恁樣從細交陪來个，連吾姆都當欽服。

對巷仔口左幹上去个有錢人家同公園起到當闊，新聞報導過後，就當多遊客來遠寮，漸漸仔乜有人來擺攤仔做生理。佢輒輒會行兼去，人客來就搨手，無人客就打嘴鼓，毋多知仔又熟事哩！異多遊客聽著佢講客，會因為試著當親切，就買加兜仔，你講，有生趣無？

佢從來就無想著面帶笑容摺講客會有麼个好空，毋過確實帶分佢異多好空！總講，就係一種當湛斗<sup>2</sup>个感覺。

<sup>1</sup> 落鏈：音 lau lien；鏈條脫落。

<sup>2</sup> 湛斗：音 zam deu`；美好、很好。